

孟東野集

冊二

孟東野詩集卷第六

山南西道節度參謀試大理評事平昌孟郊

行役

西上經靈寶觀觀即尹真舊宅

道士無白髮語音一作靈泉清青松多壽色白石恆

夜明放步霽霞起振衣華風生真文祕中頂寶氣浮

四楹一片古關路萬里今人行上仙一可見驅策徒

西征

泛黃河

誰開崑崙源流出混沌河積雨一作飛作風驚龍噴

為波湘瑟颺颺絃越賓一作鳴咽歌有根一作不可

洗虛此來經過

往河陽宿峽陵寄李侍御

暮天寒風悲屑屑啼鳥遶樹泉水噎行路解鞍投古

一珍做宋版印  
陵蒼蒼隔山見微月鷄鳴犬吠霜煙昏開囊拂巾對  
盤飧人生窮達感知己明日投君申片言

鴨路溪行呈陸中丞

鴨路不可越二十六渡溪有物飲碧水高林挂青蛭  
歷覽道更險驅使跡頻睽視聽易常主心魂互相迷  
浪石忽搖動沙堤信難躋危峯紫霄外古木浮雲齊  
出阻望汝郡大賢多招攜疲馬戀舊秣羈禽思故棲  
應憐泣楚玉棄置如塵泥

獨宿峴首憶長安故人

月迴無隱物況復大江秋江城與沙村人語風颼颼  
峴亭當此時故人不同遊故人在長安亦可將夢求  
自商行謁復州盧使君虔

一身遶千山遠作行路人未遂東吳歸暫出西京塵

仲宣荊州客今余

爲一作

竟陵賓往蹟雖不同託意皆

有因商嶺莓苔滑石坂上下頻江漢沙泥潔永日一作  
水光景新獨淚起殘夜孤吟望初晨驅馳竟何事章  
句依深仁

夢澤行

楚山爭蔽虧日月無全輝楚路饒迴惑旅人有一作  
迷歸騏驥思北首鷓鴣願南飛我懷京雒遊未歇風  
塵衣

京山行

衆畜聚病馬流血不得行後路起夜色前山聞虎聲  
此時遊子心百尺風中旌

旅次湘沅有懷靈均

分拙多感激久遊遵長塗經過湘水源懷古方踟躕  
舊稱楚靈均此處殞忠軀側聆故老言遂得旌賢愚  
名參君子場行爲小人儒騷文銜貞亮體物情崎嶇

三黜有愠色卽非賢哲模五十爵高秩謬膺從大夫  
曾襟積憂愁容鬢復一作先彫枯死爲不弔鬼生作猜

謗徒吟澤潔其身忠節寧見輸懷沙滅其性孝行焉  
能俱且聞善稱君一何善自殊且聞過稱己一何過  
不渝悠哉風土人角黍投川隅相傳歷千祀哀悼延  
八區如今聖明朝養育無羈孤君臣逸雍熙德化盈  
紛敷巾車徇前侶白日猶昆吾寄君臣子心戒此真

良圖

過彭澤

揚帆過彭澤舟人訝歎息不見種柳人霜風空寂歷

過分水嶺

山壯馬力短路行石齒中十步九舉轡迴環失西東  
溪水變爲雨懸崖陰濛濛客衣飄颻初葛花零落風

白日捨我沒

一作去

征途忽然窮



分水嶺別夜示從弟寂

一作示于孟叔

南中少平地山水重疊生別泉萬餘曲迷舟獨難行  
四際亂峯合一眺千慮并潺湲冬夏冷光彩晝夜明  
賞心難久勝離腸忽自驚古木搖霽色高風動秋聲  
一作古木解舊葉迴風結秋聲飲爾一樽酒慰我百憂輕嘉期何處  
定此晨堪寄情

連州吟三章

春風朝夕起吹綠日日深試爲連州吟淚下不可禁  
連山何連連連天碧岑崟衰猿哭花死子規裂客心  
蘭芷結新佩瀟湘遺舊音怨聲能翦絃坐撫零落琴  
羽翼不自有相追力難任唯憑方寸靈獨夜萬里尋  
方尋魂飄颻南夢山嶠欵髣髴驚魍魎悉窅聞楓林  
正直被放者鬼魅無所侵賢人多安排俗士多虛歆  
孤懷吐明月衆毀鑠黃金願君保玄曜壯志無自沉

朝亦連州吟暮亦連州吟連州果有信一紙萬里心  
開緘白雲斷明月墮衣襟南風嘶舜瑄苦竹動猿音  
萬里愁一色瀟湘雨淫淫兩劍忽相觸雙蛟恣浮沉  
鬪水正迴斡倒流安可禁空愁江海信驚浪隔相尋

旅行

楚水結冰薄楚雲爲雨微野梅參差發旅榜逍遙歸

紀贈

上河陽李大夫

上將秉神略至兵無猛威三軍當嚴冬一撫勝重衣  
霜劍奪衆景夜星失長輝蒼鷹獨立時惡鳥不敢飛  
武牢鎖天關河橋紐地機大將奚以安守此稱者稀  
貧士少顏色貴門多輕肥試登山岳高方見草木微  
山岳恩旣廣草木心皆歸

投贈張端公

君子量不極，曾吞百川流。嫉邪霜氣直，問俗春辭柔。  
日戶晝輝靜，月盃宵景幽。詠驚芙蓉發，笑激風飈秋。  
鸞步獨無侶，鶴音仍寡儔。幸沾分寸顧，散此千萬憂。

贈蘇州韋郎中使君

謝客吟一聲，霜落羣聽清。文含元氣柔，鼓動萬物輕。  
嘉木依性植，曲枝亦不生。塵埃徐庾詞，金玉曹劉名。  
章句作雅正，江山益鮮明。蘋萍一水草，菰蒲片池榮。  
曾是康樂詠，如今奉其英。顧惟菲薄質，亦願將此并。

上張徐州

爲水不入海，安得浮天波。爲木不在山，安得橫日柯。  
再來君子傍，始覺精義多。一作藝多大德唯一施，衆情自  
偏頗。至樂無一作變宮徵，至聲遺謳譟。願鼓空桑絃，永

使萬物和。顧己誠拙訥，干名已蹉跎。獻詞唯在口，所  
欲無餘它。乍作支泉石，乍作翳松蘿。一不改方圓，破



質為琢磨賤子本如此大賢心若何豈是無異途異途難經過

上包祭酒

岳岳冠蓋彥英英文字雄瓊音獨聽時塵韻固不同春雲生紙上秋濤起會中時吟五君詠再舉七子風何幸松桂侶見知勤苦功願將黃鶴翅一借飛雲空

贈崔純亮

食薺腸亦苦強歌聲無歡出門即有礙誰謂天地寬有礙非遐方長安大道傍小人智慮險平地生太行鏡破不改光蘭死不改香始知君子心交久道益彰君心與我懷離別俱迴遑譬如浸蘖泉流苦已日長忍泣目易衰忍憂形易傷項籍非不壯賈生非不良當其失意時涕泗各沾裳古人勸加飧一作食此飧一作食難自強一飯九祝噎一嗟十斷腸況是兒女怨怨

氣凌彼蒼彼蒼昔有知白日下清霜今朝始驚歎一作呼  
碧落空茫茫

贈文應上人

棲遲青山巔高靜身所便不踐有命草但飲無聲泉  
齋性空轉寂學情深更專經文開貝葉衣製垂秋蓮  
獸此俗人羣暫來還却旋

巖河南

赤令風骨峭語言清霜寒不必用雄威見者毛髮攢  
我有赤令心未得赤令官終朝衡門下忍志將筑彈  
君從西省郎正有東洛觀洛民蕭條久威恩憫撫難  
苦竹聲嘯雪夜齋聞千竿詩人偶寄耳聽苦心多端  
多端落盃酒酒中方得歡隱士多隱酒此言信難刊  
取次令坊沽舉止務在寬何必紅燭嬌始言清宴闌  
丈夫莫矜莊矜莊不中看

贈李觀 觀初登第

誰言形影親燈滅影去身誰言魚水歡水竭魚枯一作

損鱗昔為同恨客今為獨笑人捨予在泥轍飄跡上

雲津臥木易成蠹棄花難再春何言對芳景愁望極

蕭晨埋劍誰識氣匣絃日生塵願君語高風為余問

蒼旻

吳安西館贈從弟楚客

蒙籠楊柳館中有南風生風生今為誰湘客多遠情

孤枕楚水夢獨帆楚江程覺來殘恨深一作尚與歸

路并玉匣正絃在請君時一鳴

贈章仇將軍

將軍不誇劍才氣為英雄五岳拽力內百川傾意中

本立誰敢拔飛文自難窮前時天地翻已有扶正功

贈道月上人

僧貌淨無點僧衣寧綴華尋常晝日行不使身影斜  
飯木煑松柏坐山敷一作邀雲霞欲知禪隱高緝薛爲  
袈裟

杼情因上郎中二十二叔監察十五叔兼呈

李益端公柳綽評事

方憑指下絃寫出心中言寸草賤子命高山主人恩  
遊邊風沙意夢楚波濤魂一日引別袂九迴霑淚痕  
自悲何以然在禮闕晨昏名利時轉甚是非宵亦喧  
浮情少定主百慮隨世翻舉此曾臆恨幸從賢哲論  
明明三飛鸞一作步兵與雙鸞照物如朝暾

贈城郭道士

望裏失却山聽中遺却泉松枝休策雲藥囊翻貯錢  
曾依青桂鄰學得白雲絃別別意未迴世上爲隱仙

桐廬山中贈李明府

靜境無濁氛清雨零碧雲千山不隱響一葉動亦聞  
卽此佳志士精微誰相羣欲識楚化一作章句袖中蘭

芭薰

獻漢南樊尚書

天下昔崩亂大君識賢臣衆木盡搖落始見竹色真  
兵勢走山岳陽光潛埃塵心開玄女符面縛清波人  
異俗既從化澆風亦歸淳自公理斯郡寒谷皆變春  
旗影卷赤電劍鋒匣青鱗如何嵩高氣作鎮楚水濱  
雲鏡忽開霽一作景孤光射無垠乃知尋常鑒照影不  
照神

贈轉運陸中丞

掌運職既大摧邪名更雄鵬飛簸曲雲鶚怒生直風  
投彼霜雪令翦除荆棘叢楚倉傾向西吳米發一作登  
自東帆影咽河口車聲聳關中堯知才策高人喜道



路通皆驚內史力繼得鄼侯功萊子真爲少相如未  
免窮衣花野菡萏書葉山梧桐不是宗匠心誰憐久  
栖霞

贈萬年陸郎中

天子憂劇縣寄深華省郎紛紛風響珮蟄蟄劍開霜  
舊事笑堆案新聲唯雅章誰言百里才終作橫天梁  
江鴻恥承眷雲津未能翔徘徊塵俗中短毳無輝光  
擢第後東歸書懷獻坐主呂侍郎

昔歲辭親淚今爲戀恩泣去住情難並別離景易戢  
天矯大空鱗曾爲小泉蟄幽意獨沉時震雷忽相及  
神行旣不宰直致非所執至運本遺功輕生各一作苦

自立大君思此化良佐自然集寶鏡無私光時文有  
新習慈親誠志就賤子歸情急擢第謝靈臺牽衣一作

名出皇邑行襟海日曙逸抱江風入蒹葭得波浪笑

蓉紅岸濕雲寺勢動搖山鐘韻噓吸舊遊期再踐懸  
水得重挹松蘿雖可居青紫終當拾

古意贈梁肅補闕

曲木忌日影讒人畏賢明自然照燭間不受邪佞輕  
不有百鍊火孰知寸金精金鉛正同一作鑪願分精  
與麤

贈黔府王中丞楚

舊說天下山半在黔中青又聞天下泉半落黔中鳴  
山水千萬遶中有君子行儒風一以扇汗俗心皆平  
我願中國春化從異方生昔為陰草毒今為陽華英  
嘉實綴綠蔓涼湍瀉清聲逍遙物景勝視聽空曠并  
困驥猶在轅沉珠尚隱精路遐莫及盼泥污日已盈  
歲晏將何從落葉甘自輕

上達溪舍人

北山少日月草木苦風霜貧士在重坎食梅有酸腸  
萬俗皆走圓一身一作心猶學方常恐衆毀至春葉成  
秋黃大賢秉高鑒公燭無私光暗室曉未及幽吟涕  
空行

贈主人

斗水瀉大海不如瀉枯池分明賢達交豈顧豪華兒  
海有不足流豪有不足資枯鱗易爲水貧士易爲施  
幸覩君子席會將幽賤期側聞清風議如飲黃金卮  
此道與日月同光無盡時

贈建業契公

師住青山寺清華常遶身雖然到城郭衣上不棲塵  
獻襄陽于大夫

襄陽青山郭漢江白銅堤謝公領茲郡山水無塵泥  
鐵馬萬霜雪絳旗千虹蜺風漪參差泛石板重疊躋

舊淚不復墮新歡居然齊還耕竟原野歸老相扶攜  
物色增曖曖寒芳更萋萋淵清有遐略高躅無近蹊  
一作衆賦無暴掠輿歌有安綏卽此富蒼翠自然引翔棲曩遊常抱  
憶夙好今尚睽願言從逸轡暇日凌清溪

贈鄭夫子魴

天地入曾臆吁嗟生風雷文章得其微物象由我裁  
宋玉逞大句李白飛狂才苟非聖賢心孰與造化該  
勉矣鄭夫子驪珠今始胎

大隱訪三首

崔從事郎以直隲職一作官

古人留清風千載遙贈君破松見貞心裂竹看直文  
殘月色不改高賢德常新家懷詩書富宅抱草木貧  
安得一蹄泉來化千尺鱗含意永不語釣璜幽水濱  
章仇將軍良棄功守貧